

BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINSKI SUD U ZENICI  
Broj: 43 0 St 232577 23 St  
Zenica, 12.09.2024. godine

Općinski sud u Zenici, stečajni sudija Amela Sinanović, u prethodnom postupku za utvrđivanje uvjeta za otvaranje stečajnog postupku nad stečajnim dužnikom Ustanova za smještaj starijih lica „ZLATNO DOBA“ Usora, Žabljak bb, Žabljak, Usora, nakon održanog ročišta za utvrđivanje uvjeta za otvaranje stečajnog postupka održanog dana 12.09.2024. godine u prisustvu privremenog stečajnog upravnika Alić Izudina, a u odsustvu uredno obaviještenog predlagatelja, dana 12.09.2024. godine, donio je sljedeće:

### R J E Š E N J E

Pozivaju se povjerioci i zainteresirana lica da u roku od 30 dana od dana objavljivanja poziva uplate predujam za obezbijeđenje troškova stečajnog postupka u iznosu od 5.000,00 KM, na depozitni račun ovoga suda broj: 134-010-0000044837 otvoren kod ASA Banke d. d. Sarajevo, te da po izvršenoj uplati predujma sudu dostave uplatnicu, kao dokaz da je uplata izvršena.

Ukoliko u ostavljenom roku povjerioci i zainteresirana lica ne uplate predujam sud će po prijedlogu privremenog stečajnog upravnika zaključiti stečajni postupak nad subjektom Ustanova za smještaj starijih lica „ZLATNO DOBA“ Usora, matični broj subjekta upisa 43-05-0010-15, te naložiti brisanje ovog društva iz sudskog registra.

### O b r a z l o ž e n j e

Rješenjem ovog suda broj 43 0 St 232577 23 St od 16.10.2023. godine pokrenut je prethodni postupak radi utvrđivanja uvjeta za otvaranje stečajnog postupka nad stečajnim dužnikom Ustanova za smještaj starijih lica „ZLATNO DOBA“ Usora, Žabljak bb, Usora.

Na ročištu za ispitivanje uvjeta za otvaranje stečajnog postupka održanom dana 11.06.2024. godine, privremeni stečajni upravnik je ostao kod svog Izvještaja od 27.11.2023. godine, te istaknuo da je društvo posljednje poslovne aktivnosti ostvarilo u 2021. godini, da je poslovni prostor vlasništvo treće osobe i isti je korišten po osnovu Ugovora o zakupu, a koji ugovor je raskinut u prvoj polovini 2021. godine, da za navedenu poslovnu i kalendarsku godinu društvo nije sačinilo obavezni godišnji izvještaj o poslovanju. Za 2022. godinu, sačinjen je finansijski izvještaj, ali da isti nije u skladu sa propisima obzirom da su skoro sve stavke i bilansne pozicije prepisane iz prethodnih godina, što znači da nije vršen obavezni godišnji popis roba, potraživanja, zaliha i obaveza, tako da su u bilansima ostale stvari koje ne postoje. Ističe da se radi o specifičnom vidu ostvarenja prihoda obzirom da je riječ o udomljavanju starijih i nemoćnih osoba, te da su sredstva većinom uplaćivana od rodbine koja se pretežno nalazi u inostranstvu. Prema poslovnim knjigama tokom 2022. godine, društvo nije ostvarivalo poslove prihode niti je bilo poslovnih rashoda. U prethodnoj 2021. godini, društvo je ostvarilo prihod od 35.936,00 KM, dok su poslovni rashodi iznosili 37.427,00 KM, tako da je za narednu godinu ostvaren gubitak u iznosu od 1.941,00 KM. Prema Bilansu stanja na dan 31.12.2022. godine, prikazana je ukupna aktiva odnosno imovina društva u iznosu od 70.921,00 KM, ali da ovakvo stanje ne odgovara stvarno utvrđenom činjeničnom stanju.

Stavka postrojenja i opreme koja podrazumijeva motorno vozilo, kuhinju, aparate, šporete, frižidere, nisu popisivani niti je vršena amortizacija naročito motornog vozila za čiji popravak društvo nije imalo interesa. Ističe da je predmetno vozilo 2017. godine doživjelo kvar otkada je van funkcije, te da je 2017. godine vrijednost vozila bila 5.500,00 KM. Od navedenih potraživanja u iznosu od 14.000,00 KM, iznos od 9.100,00 KM se odnosi na osobu Nevzatović Mirsad, iznos od 1.500,00 KM na osobu Hadžanlić Ismet, iznos od 1.400,00 KM na osobu Jelić Jela, te 15ak osoba za trošak jednog eventualno dva zbrinjavanja. U smislu imovine, u bilansu je prikazana stavka pod nazivom novac i novčani ekvivalent u iznosu od 14.494,00 KM, što bi trebalo biti stanje gotovine ili stanje na transakcijskom računu, ali prikazano nije u skladu sa realnim stanjem. Što se tiče obaveza, društvo je prema objavljenim finansijskim rezultatima sa 31.12.2022. godine iskazalo ukupne obaveze u iznosu od 55.668,00 KM i iste se sastoje od: obaveza prema dobavljačima u iznosu od 13.217,00 KM, ostale finansijske obaveze u iznosu od 445,00 KM, te ostale obaveze kao što su obaveze po osnovu javnih prihoda, doprinos za PIO u iznosu od 13.013,47 KM, doprinosa za zdravstvenu zaštitu u iznosu od 9.183,33 KM, doprinosa za zapošljavanje u iznosu od 1.752,83 KM, poreza na dohodak u iznosu od 2.259,37 KM, te neisplaćene neto plaće u iznosu od 10.084,21 KM. Ističe da društvo nije posjednik niti vlasnik nekretnina.

Na nastavku ročišta za ispitivanje uvjeta za otvaranje stečajnog postupka održanom dana 12.09.2024. godine, privremeni stečajni upravnik je ostao kod svog Izvještaja od 27.11.2023. godine, kao i dopune Izvještaja koja se odnosi na status evidentiranih a nenaplaćenih potraživanja za izvršene usluge smještaja starih i iznemoglih lica. Prema finansijskim podacima iz poslovnih knjiga na dan 31.12.2022. godine, prikazano je potraživanje od 43.527,00 KM što odgovara iznosu potraživanja za 2021. godinu. Ističe da od navedenog iznosa, iznos od 14.000,00 KM se odnosi na sporna potraživanja koja nisu utuživana i koja protekom tri godine trebaju biti otpisana i isknjižena iz poslovne knjige. U dopuni Izvještaja, poimenično su nabrojana lica koja su bila smještena u ustanovi sa iznosima potraživanja odnosno njihovim obavezama prema Ustanovi. Uz dopunu Izvještaja priložena je i ovjerena izjava vlasnika i odgovorne osobe ustanove iz koje proističe da tokom poslovanja ustanove nije vršeno utuživanje niti druge prisilne metode naplate potraživanja kako zbog nedostatka sredstava za vođenje parničnih postupaka, tako i zbog velikog procenta rizika za naplatu. Većina potraživanja se odnosi na lice Nevzatović Mirsad, koji je duži vremenski period zbrinut bez naknade jer je lice tvrdilo da nema nikakav smještaj niti rodbinu. Ostatak potraživanja se u najvećem dijelu odnosi na mjesečne fakture iz januara i februara 2021. godine, s tim da je Ustanova u faktičkom smislu napustila zaključljeni prostor 14. marta 2021. godine o čemu je pismenim putem obavijestila mjerodavne institucije o nelikvidnosti i poremećaju u poslovanju. Što se tiče preostale imovine društva u toku trajanja prethodnog postupka, odgovorna osoba društva je uz saglasnost i koordinaciju sa privremenim stečajnim upravnikom izvršila prodaju rashodovanih i neispravnih dijelova opreme kao što su električni šporet koji je bio korišten i neispravan za iznos od 100,00 KM, frižider koji je bio korišten i neispravan za iznos od 100,00 KM, autoklav koji je rabljen i neispravan za iznos od 500,00 KM i sanitetsko vozilo rabljeno i neispravno za iznos od 700,00 KM, što ukupno iznosi 1.400,00 KM. Navedena novčana sredstva su uplaćena na račun društva, a banka je izvršila plaćanje prema povjericima sukladno redu prioriteta kojim je račun bio blokiran. Navedeno proističe iz Računa – otpremnice broj 001-2023 od 21.11.2023. godine, Računa – otpremnica broj 003-2023 od 21.11.2023. godine, kopije uplatnice od 23.11.2023. godine i Izvoda broj 4. UniCredit Bank d.d. od 24.11.2023. godine. Prema pregledu naloga prinudne naplate izdate od strane UniCredit Bank, poslovnica Tešanj, od 17.11.2023. godine, stoji da je transakcijski račun stečajnog dužnika blokiran za ukupan iznos od 10.647,89 KM, s tim da je prvi put blokiran dana 19.02.2021. godine od strane Kantonalnog poreznog ureda Zenica u iznosu od 7.647,89 KM.

Privremeni stečajni upravnik ističe da odgovorno lice stečajnog dužnika nije podnijelo prijedlog za otvaranje stečajnog postupka u roku od 60 dana od dana nastupanja platežne

nesposobnosti u skladu sa članom 63. stav 7. Zakona o stečaju, te da isti niti u cjelini niti djelimično ne može nastaviti poslovanje u toku prethodnog postupka u skladu sa čl. 63. stav 3. Zakona o stečaju. Navodi da postoje razlozi za otvaranje stečajnog postupka, utvrđena je platežna nesposobnost dužnika, da na osnovu utvrđenog činjeničnog dio potraživanja nije zastario i da je utuživ, te da eventualno sticanje imovine na strani stečajnog dužnika može biti samo rezultat parničnih postupaka, ali da društvo nema imovine druge imovine niti novčanih sredstava za pokretanje parničnih postupaka, to predlaže da sud pozove povjerioce i zainteresovana lica da predujme troškove vođenja postupka u iznosu od 5.000,00 KM, a u protivnom ukoliko niko ne predujmi navedeni iznos da sud otvori i istovremeno zaključi stečajni postupak i briše navedeno pravno lice iz evidencije privrednih subjekata.

Kako stečajni dužnik ima obaveze, a nema imovine, pa ni za troškove stečajnog postupka, to je sud primjenom odredbe člana 102. stav 7. i 8. Zakona o stečaju („Službene novine F BiH“, broj 53/21) pozvao povjerioce i zainteresovana lica da uplate predujam za obezbjeđenje troškova stečajnog postupka. Visina troškova srazmjerno je određena troškovima stečajnog postupka koji su od strane privremenog stečajnog upravnika procijenjeni na iznos od 5.000,00 KM.

Slijedom navedenog odlučeno je kao u izreci ovog rješenja primjenom odredbe člana 196. stav 3. Zakona o stečaju, a ovim rješenjem povjerioci i zainteresovana lica su upozorena na posljedice propuštanja postupanja po pozivu ovog suda.

**POUKA O PRAVNOM LIJEKU:**

Protiv ovog rješenja nije  
dozvoljena žalba.

Stečajni sudija  
Amela Sinanović, s.r.